

Negara-negara Islam harap Dr. Mahathir terus main peranan

UM - 9 SEP 2003

KUALA LUMPUR 8 Sept – Negara-negara Islam berharap Datuk Seri Dr. Mahathir Mohamad akan terus memainkan peranan dalam Pertubuhan Persidangan Islam (OIC) walaupun setelah melepaskan jawatan sebagai Perdana Menteri pada Oktober ini.

Pemimpin-pemimpin Iran, Yemen, Emiriyah Arab Bersatu (UAE) dan Uzbekistan berpendapat Dr. Mahathir mampu memimpin negara-negara Islam dan OIC.

Harapan dan pandangan pemimpin keempat-empat negara itu disuarakan kepada Menteri di Jabatan Perdana Menteri, Datuk Seri Dr. Rais Yatim yang mengadakan pertemuan dengan mereka dalam lawatan kerjanya ke semua negara terbabit baru-baru ini.

“Rata-rata daripada mereka memberikan penghargaan kepada Dr. Mahathir di mana pandangan dan pemikirannya kerap mendapat pengiktirafan masyarakat antarabangsa.

“Mereka juga menghargai sumbangan Perdana Menteri kepada masyarakat antarabangsa khususnya dunia Islam,” katanya kepada *Utusan Malaysia* di sini, hari ini.

Beliau ditanya mengenai maklum balas yang diterima daripada kunjungannya selaku Utusan Khas kerajaan bagi menyampaikan undangan kepada empat pemimpin negara itu untuk menghadiri Sidang Kemuncak OIC ke-10 di Putrajaya pada Oktober ini.

Semua negara anggota OIC kecuali Iraq dijangka menghadiri sidang kemuncak itu yang akan diadakan di Pusat Konvensyen Putrajaya (PCC) dari 14 hingga 16 Oktober itu.

Menurut Rais, pemimpin keempat-empat negara itu berpendapat sumbangan dan idea Dr. Mahathir termasuk isu-isu ekonomi diharap dapat dimanfaatkan oleh anggota OIC.

“Mereka mahu sidang OIC kali ini digunakan sebaik mungkin untuk mencari jalan menjana ekonomi negara-negara Islam,” katanya.

Beliau menambah, pemimpin-pemimpin berkenaan juga merasakan sidang kemuncak OIC kali ini penting bagi mencari penyelesaian terhadap isu-isu Palestin dan Iraq.

Dalam pada itu, katanya, pemimpin-pemimpin berkenaan kecuali UAE telah memberikan jaminan mereka untuk menghadiri sidang kemuncak OIC kali ini. Bagaimanapun, katanya, UAE tetap akan menghantar wakil mereka berikutan masalah kesihatan yang dialami oleh ketua negaranya.